

Carta nāchindahá Pablo nuú nā cúú cuéntá Jesús ndúu ñuu Filipos

Carta nācāhyí Pablo nuú nā cúú cuéntá Jesús ndúu ñuu Filipos nani
nāsandacaan da vecaa

1 Yehe cúú Pablo ta cája chúun i xihín Timoteo cuéntá Jesucristo. Ta cáhyí nde carta yóho nu tóco ndihi nā cúú cuéntá Jesús, nā ndúu ñuu Filipos jáchi in nanduu na xihín Jesucristo. Ta cáhyí ri nde carta yóho nuú nā sacuahā nuú nā cúú cuéntá Jesús xihín nuú nā chindeé mé nā sacuahā veñuhu. ²Xíca tahví i nu Ndióxi, tátá yo xihín nuú Jesucristo, xitoho í ña ná caja cuahā mé á ñamaní xihín ndo ta ná caja mé á ña ná coo vaha ini ndó.

Xíca tahví Pablo nu Ndióxi sahā nā cúú cuéntá Jesús

³Ndíquiahva ndivaha i ndixahvi nu Ndióxi tá ndícuhun ini i sahā ndo. ⁴Níí tiempo tá xíca tahví i nu Ndióxi sahā ndihi ndo cájii ini i. ⁵Jáchi janda tá nandiquehe ndó íchi cuéntá Jesús ta janda viti nāchindeé ndó yehe cáhan i tūhun Ndióxi xihín ñayivi. ⁶Nācasáhá Ndióxi cája ña ná nduu ndó ñayivi ndaa nu mé á ta xíní vaha i ña jáxinu coo a ña janda quiahva ná xinu coo quiví quixi tucu Jesucristo ñuyiví yóho. ⁷Cája i cuéntá vaha ndivaha va ndíquiahva i ndixahvi nu Ndióxi sahā ndo jáchi mé a ndaa quíhvi ndivaha ini i ndohó. Tá quiahva cája Ndióxi ñamaní xihín i quiahva já cája ri a ñamaní xihín mé ndó. Ta coó caja toho a tá ndácaan i vecaa. Ta coó caja toho a tá ná ndiquehe vaha i sahā tūhun Ndióxi nuú nā jutixia á tá caxi tūhun i xihín ñayivi ña mé a ndaa cúú á tūhun Ndióxi, ña cúú jácacu ñayivi. ⁸Ta cándaa cáxí ini Ndióxi ña quíhvi ndivaha ini i ndohó tá quiahva quíhvi ini Jesucristo ndohó. ⁹Xíca tahví i nu Ndióxi ña ná xinu ini ndó quíhvi chága ini ndó ñayivi. Ta ná ndindíchí chága jiní ndó ta ná coo chága xíní túní ndo. ¹⁰Já ná cuu caxi ndó ña vaha chága níí tiempo ta xihín ña yóho cacuu ndó ñayivi ndaa, nā co ndójo cuachi tá ná xinu quiví quixi tucu Jesucristo. ¹¹Ndítahan caja ndó ña vaha xihín ndinuhu ini ndó jáchi xihín ña yóho jánahā ndó nuú ñayivi ña mé a ndaa cúú ndó cuéntá Jesús ta xihín ña yóho ndicáhnu ndivaha Ndióxi.

Ná caja í ña cúní Jesucristo xihín ndinuhu ini i

¹²Candehé ndó, ñani mí i, na cúú cuéntá Jesús. Cúní ña ná cándaa ini ndó ña ndóho i vecaa yóho. Mé a ndaa sahá ña ndácaan i vecaa yóho naxini johó cuahá chága ñayivi tuhun vaha sahá Jesucristo. ¹³Tóco ndihi soldado, na ndúu vehe rey yóho xihín java ga ñayivi sa cándaa ndihi ini na ña ndácaan i vecaa sahá ña ndíco i íchi cuéntá Jesucristo. ¹⁴Ta sahá ña nacandaa ini cuahá na cúú cuéntá Jesús ña ndácaan i vecaa yóho, nandindeé ini na caca nuu na cahan na tuhun Ndióxi xihín ñayivi ta co yíhvi na caja na ña jáchi cándee cáhnu chága ini na Ndióxi viti.

¹⁵Mé a ndaa ndúu java na xica nuu cahan tuhun Ndióxi nuú ñayivi sahá ña cáhíhvi cuití ini na. Ta java na cája na ña jáchi cúní na cajojó na nuú i. Joo mé a ndaa java na cahan na tuhun Ndióxi sahá ña cúní na caja na ña vaha. ¹⁶Joo java na cahan na tuhun Ndióxi sahá ña vaha mé cuití va na ta co cája na ña xihín ndinuhu ini na. Ña cúní na caja na quea jáquihvi chága na yehe nani ndácaan i vecaa yóho. ¹⁷Joo mé a ndaa java na cahan na sahá Jesucristo jáchi quíhvi ndusa ini na yehe ta sa cándaa ini na ña nasacu Ndióxi yehe yóho ña ná ndiquehe e sahá tuhun vaha cahan sahá Jesucristo. ¹⁸Joo co sáhní toho i mí i ndá saha cája na ña jáchi cájii ini i tá cahan na sahá Jesucristo nuú ñayivi. Ta cájii chága ini i ¹⁹jáchi cándaa ini i ña quee vaha i nu tóco ndihi ña ndóho i yóho sahá ña chindeé ínima Jesucristo yehe ta sahá ña xica tahví ndó nu Ndióxi sahá i. ²⁰Cándee ini i ña a cándoó núu i. Ta ndáti tiaha i chindeé Ndióxi yehe já ná cuu cahan i sahá Jesucristo nuú ñayivi. Xihín ña cahan i yóho jánaha i ndá quiahva cáhnu cúú Jesucristo. Ta co cája toho a á tácu u á naxihí i jáchi caja cáhnu tá caja cáhnu i Jesucristo. ²¹Ta nani tácu u ín i ñuyíví yóho cája cáhnu i Jesucristo xihín ndinuhu ini i. Ta tá ná quivi i já vaha chága ví jáchi cūhun i coo i xihín mé á. ²²Ta co cándaa ini i ndía vaha chága jáchi tá ná catacu u já cuu ñehe chága ín i cahan i sahá Jesucristo xihín ñayivi. ²³Ivi johó cáhvi ini i ña á vaha chága ná catacu u á vaha chága ná quivi i. Jáchi tá ná quivi i ivi laá xinu coo i coo i xihín Jesucristo. Ta vaha chága ná cūhun i coo i cán a juú ga ña ná coo i ñuyíví yóho. ²⁴Joo saha mé ndó xíní núhú coo too chága i ñuyíví yóho. ²⁵Ta viti cándaa vaha ini i ña coo chága i ñuyíví yóho ña ná chindeé e ndohó catiaha chága ndó tuhun Ndióxi já ná cajii chága ini ndó sahá ña cándee ini ndó mé á. ²⁶Sahá ña cán quea cuu cajii ini ndó sahá ña coo tucu u xihín ndó ta cuu caja cáhnu ndó Jesucristo sahá ña yóho.

²⁷Cúní ña ná ndihi ini ndó caja ndó tá quiahva cáhí tuhun vaha cahan sahá Jesucristo. Já quea tá ná saa i á tá ná a saa toho i coto nihni i ndohó cúní ñehé e tuhun ña in cúú ndihi ndó ta ndúu ndacú ndo cuéntá Ndióxi.

Ta cúni ñehé e tuhun ña in cúu ndó ndúcú ndéé ndo cáhan ndó tuhun vaha sahá Jesucristo nuú ñayivi ña ná candeé ini na mé á. ²⁸Ta coto a quiahva ndó ñamani nuú na ihvi ndo jan ña ná jáyihví na ndohó. Jáchí xihín ña yóho cándaá ini na cán ña xíca na cuahan na nuú ndihi saha ná. Joo mé ndó cándaá ini ndó ña xíca ndó íchí nuú cacu ndaa ínima ndo caja Ndióxi. ²⁹Jáchí sahá ña nacaja Jesucristo ñéhe táhvi ndó candeé ini ndó mé á. Ta quiahva já ñéhe táhvi ri ndó ndóho ini ndó sahá ña candeé ini ndó mé á. ³⁰In nuú ndóho iní sahá Jesucristo. Sa naxini ndó ndá quiahva nandoho ini i jihna. Ta sa ñéhe ndó tuhun ndá quiahva ndóho ini i viti.

Nanduu Jesucristo ñayivi vatí cúu á Ndióxi

2 Xíni vaha i ña sáhan Jesucristo tuhun ndéé ini ndó ta quíhvi ini a ndohó. Xíni vaha i ña in nanduu ndó jáchí ndácaan ínima yíi Ndióxi ini ínima ndo. Xíni vaha i ña quíhvi ini táhan ndó ta táhnda ini saha táhan ndó. ²Sahá ña cán quéa ndítahan caja ndó ña ná cajii ndivaha ini i sahá ña in cúu ndihi ndó ta sahá ña quíhvi chága ini táhan ndó. Ta sahá ña in nanduu ndó nacaja ínima yíi Ndióxi já in nanduu xíní túní ndo nuú ña cúni ndó caja ndó. ³Coto a ndúcú cuachi xihín táhan ndó. Ta coto a ndínehe jícó ndo mé ndó. Ndítahan coo ndisáhnú ini ndó. Ta ndítahan cahán ndo ña cáhnu chága inga ñayivi a juú ga mé ndó. ⁴Ta co ndítahan ndihi ini ndó sahá ña vaha mé ndó cuití va. Xíní ñúhú ndihi ri ini ndó sahá ña vaha inga na.

⁵Xíní ñúhú cahvi ini ndó tá quiahva nasacahvi ini Jesucristo. ⁶Jáchí tá quiahva íin Ndióxi quiahva já íin Jesucristo. Ta vatí cúu á Ndióxi joo coo nandaja cáhnu a mé á vatí cuu caja ña, nduu. ⁷Ña nacaja Jesucristo quéa nasacu xóo a tóco ndihi ña cáhnu cúu mé á cán ta naquixi a nacacu a ñuyíví yóho tá quiahva cácu ñayivi. Ta nasacuu a in dataa, da cája chúun cuéntá xitoho da. ⁸Tá nandihí nanduu a ñayivi já najánuu a mé á janda quiahva nasahan mé á quivi a ndica crúxu nuú naxihí a tátuhun da cája cuachi quini. ⁹Sahá ña cán quéa najándindita jícó ndivaha Ndióxi Jesucristo ta nasahan in quiví á nu á ta quiví Jesucristo yóho quéa cáhnu chága nu tóco ndihi quiví. ¹⁰Sahá ña cán quéa tóco ndihi na ndúu indiví xihín na ndúu ñuyíví cuni johó na quiví Jesucristo ta já ndaca xítí na nu á. Ta janda na ndúu tixi ñúhu ndaca xítí na nuú Jesucristo ña caja cáhnu na mé á. ¹¹Anda jáví cahan in in na cán ña cúu Jesucristo xitoho na ta xihín ña yóho ndicáhnú ndivaha Ndióxi, tátá yo.

Na cúu cuéntá Jesús cúu ná tátuhun ñúhu, ña jándiyehé ñuyíví yóho

¹²Candehé ndó ñani mí i, na cúu cuéntá Jesús. Tá quiahva nacandúsa ndó caja ndó ña nasahnda i nu ndo tá nasahin i tañu ndó jan quiahva já

ndítahan candúsa chága ndó yehe viti nani íin xíca i nu ndo. Xíní ñúhú ndíhi ini ndó cajú ndó ña cúní Ndióxi jáchi najácacu a ndohó. Ta xíní ñúhú cayihví ndó Ndióxi nani cája cáhnu ndó a xihín ndinuhu ini ndó. ¹³Jáchi Ndióxi quéa cája ña xíca ini ndó cája ndó ña vaha ta chindeé a ndohó cája ndó ña táhán ini mé á xihín.

¹⁴Ta a cáhan cuachí ndo saha tóco ndíhi ña cája ndó. Ta ni a ndítuhún ihví xihín táhan ndó. ¹⁵Já ná naha ña cúu ndó ñayivi víí, na coó cuachi. Ndítahan cajú ndó tá quiahva cája na cúu jahyi Ndióxi, na co cáquini xihín cuachi ña cája ñayivi quini cuéntá ñuyíví yóho. Cúu á tátuhun ndíyihví ndaa ndó xihín ña vaha cája ndó tá quiahva ndíyihví ndaa quimi indiví. ¹⁶Jáchi cáhan ndó tuhun vaha sahá Jesucristo nuú ñayivi já ná cuu catacu na anda ama cáa quívi. Tá ná cajú ndó ña yóho já quéa cajii ini i xihín ndó tá ná xinu quívi quixi tucu Jesucristo. Jáchi xihín ña yóho candaá ini i ña a juú ña uun nasacuu chuun nacaja i. ¹⁷Ta vatí ná ndiquiahva i mí i quívi i saha ndo joo cajii tá cajii ini i. Jáchi tá ná quívi i cúu á tátuhun catáhan i xihín ña joco ndó nu Ndióxi sahá ña cándeé ini ndó mé á. Ta sahá ña yóho cajii ini i ta in nuú cajii ini ndihí. ¹⁸Sahá ña cán quéa ndítahan cajii ini mé va ndó já ná cajii ini ndihí.

Sácú ini Pablo chindahá da Timoteo xihín Epafrodito nuú na ñuu Filipos

¹⁹Ta cúní Jesucristo, xitoho í chindahá yachi i Timoteo nu ndo ña ná cañehe da tuhun saha ndó nuú i. Anda jáví cajii ini i tá ná candaá ini i saha ndo. ²⁰Mé a ndaa quíhvi ini da ndohó ta coó ga inga da núhu ini saha ndo tá quiahva núhu ini yehe saha ndo. ²¹Jáchi java ga na cúu cuéntá Jesús ndícani ini na sahá ñaha mé va na ta co ndícani ini na sahá ñaha cuéntá Jesucristo. ²²Joo sa xíní ndó ña cúu Timoteo taa vaha ndivaha ta sa candaá ini ndó ndá quiahva chindeé da yehe nu xíca i cáhan i tuhun Ndióxi xihín ñayivi. Cúu dá tátuhun jahyi i jáchi chindeé cuahá da yehe. ²³Sahá ña cán quéa sácú ini i chindahá i da nu ndo tá sa nacandaá ini i ndaja cáa sahá i. ²⁴Ta cándeé ini i ña quiahva Ndióxi ñamaní nuú i saa yachi mé ví coto nihni i ndohó jan.

²⁵Cája i cuéntá xíní ñúhú chindahá i ñaní Epafrodito ña ná ndicó coo tucu da nu ndo jáchi mé ndó nachindahá ndó da nuú i ña ná chindeé da yehe. Ta mé a ndaa cuahá ndivaha nachindeé da yehe janda quiahva nandoho ini da xihín i. ²⁶Joo viti xíca ndivaha ini da cuni ndíhi da ndohó. Ndícani ini da saha ndo jáchi nañehé ndó tuhun ña sa naquihvi da. ²⁷Ta mé a ndaa nandoho da cuehe ta jalóho quívi da, nduu. Joo nacaja Ndióxi ñamaní xihín da ta já nandivaha da. Ta xihín ña yóho nacaja ri mé á ñamaní xihín yehe ña ná a cácuéha chága ví ini i jáchi sa íin cuaha ña ndóho i viti. ²⁸Sahá ña cán quéa chindahá númí i da ña ná saa quíi dá nu

ndó já ná cajii ini ndó cuni tucu ndó da ta xihín ña yóho ndivaha ri ini yehe va. ²⁹Ndítahan cajii ini ndó ndiquehe ndó da jáchi cúu dá ñani ndó da cúu cuéntá Jesús. Ta ndítahan coo toní ñúhú ndó xihín tóco ndihi na cája tá quiahva cája mé dá. ³⁰Jáchi mé a ndaa jalóho quivi da sahá chuun nacaja da cuéntá Jesucristo. Cuahá ndivaha tondóhó naquixi nu dá sahá ña nachindeé da yehe jáchi nacaja mé dá ña a cuú caja mé ndó yóho sahá i.

Ña íin chága saha nu Ndióxi

3 Candehé ndó ñani mí i, na cúu cuéntá Jesús. Xíní ñúhú cajii ini ndó xihín ña cája Ndióxi. Co cája toho a nu mí i cáhyí ivi tucu u ña sa nacahyí i nu ndó jihna jáchi chindeé a ndohó. ²Cuéntá coo ndó xihín ñayivi quini, na xíca cája ña núu jan. Jáchi jánaha na ña ndítahan cahnda ndó yiquí cuñu ndó ña ná chícáan ndó marca yiquí cuñu ndó já ná cacuu ndó cuéntá Ndióxi. ³Joo mí co cándúsa í ña cúu yó cuéntá Ndióxi sahá ña sáhndá yo yiquí cuñu í vatí mé a ndaa cúu yó tátuhun na naquihvi marca yiquí cuñu sahá ña cája cáhnu í Ndióxi jáchi ndácaan ínima yii mé á ini ínima yo. Ta viti cájii ini yo sahá ña cúu yó cuéntá Jesucristo. Co cándeé iní ña cája í ⁴vatí mí i cuu cachi i ña cándeé ini i ñaha nacaja i, nduu. Jáchi nasacaja i ña cáchí ley xihín ndinuhu chága ini i a juú ga inga na. ⁵Jáchi tá naxinu una quiví nacacu u já nachicaan na marca jan yiquí cuñu i. Ta mí i cúu u da Israel, da naquixi chichi Benjamín. Ta tátá náná i naquixi na chichi Israel ta cáhan nde tuhun hebreo. Ta nasandico i táhan da cúu fariseo, da sácú vaha ley Moisés. Ta nacaja i tóco ndihi ña nasahnda ley Moisés. ⁶Nasandico cáhnu ndivaha i íchi cuéntá na fariseo cán sahá ña cán quéa nacasáhá nandicuita i cája xíxi i xihín na cúu cuéntá Jesús. Xihín ndinuhu ini i nacaja i tóco ndihi ña cáchí ley sahá ña cán quéa ni in na coó nacuu chícáan na cuachi jatá i saha ley Moisés. ⁷Tóco ndihi ña yóho nasacuu a ña náhnu ndivaha nuú i. Joo viti coó sahá ga ña cán nuú i jáchi nacasáhá cándeé ini i Jesucristo. ⁸Ta mé a ndaa yahvi chága ña cándeé ini i Jesucristo a juú ga tóco ndihi ña nacaja i jihna. Saha ña cúni candaa chága ini i sahá Jesucristo, xitoho i sahá ña cán quéa najándacoo i tóco ndihi ña nacaja i cán. Ta tóco ndihi ña cán cúu á tátuhun xehe ta coó sahá toho a nuú i viti jáchi cúni candico chága i Jesús. ⁹Ta cúni cacuu u in da in ná nduu xihín Jesucristo. Joo co ndátí i nduu ndaa i nu mé á sahá ña sácú vaha i ley Moisés jáchi xíní vaha i ña cája Ndióxi ña ná nduu ndaa i nu mé á sahá ña cándeé ini i Jesucristo cuití va. ¹⁰Ña cúni quéa candaa chága ini i sahá Jesucristo. Ta cúni ña ná chutú ndaa ínima i xihín ndée Ndióxi, mé ndée ña nacaja ña nanditacu tucu Jesucristo. Ta cúni ndoho ini i tá quiahva ndoho ini mé á tá naxihí a ndica crúxu. ¹¹Já quéa ndátí i xinu coo quiví nditacu u tá ná nditacu na sa naxihí.

**Ndítahan nducú ndée yō jandā quiahva ná xīnū cōo í ndiquehé ña quiahva
Ndióxi nū yō**

¹²Cō cūni cachi i ña sa naquee vaha vi. Ni cō cūni cachi i ña sa naxīnū cōo i cúu u in taa ndaa tátuhun cūni Ndióxi. Ña cāja i quēa ndíhi ini i jáxīnū cōo i cacuu u in da cāja tá quiahva cūni Jesucristo jáchi sahá ña cán najácacu a yehe. ¹³Candehé ndo ñani i, na cúu cuéntá Jesús. Cō cūni cachi i ña sa nanduu u tá quiahva cūni mé á. Ña cāja ndusa i quēa ndíndójó i sahá ña nasacaja i jihna ta ndíhi ini i jáxīnū cōo i cāja i ña sácú ini Ndióxi caja i. ¹⁴Já caja i jandā quiahva ná xīnū cōo i ndiquehe e ña sácú ini Ndióxi quiahva nuú i sahá ña nacaja Jesucristo. Jáchi cána Ndióxi yehe cūhun i cōo i indiví xihīn mé á.

¹⁵Tócó ndíhi mé ndó, na sa nandindacú xihīn ña cāndeé ini ndó Ndióxi, xíní ñúhú cahvi ini ndó tá quiahva cáhvi ini yehe. Ta tá cō cáhvi ini ndó tá quiahva cáhvi ini yehe já quēa jándiyéhe Ndióxi xíní túní ndo ña ná cajii ini ndó xihīn á. ¹⁶Joo ndítahan nū yō caja í ña ndaa, ña cōo najándacoo í cāja í anda viti.

¹⁷Candehé ndo ñani i, na cúu cuéntá Jesús. Ndítahan candehé ndo ndá quiahva cāja yehe ña ná caja ndó ña. Ta ndítahan candehé ndo ndá quiahva cāja java ga na sa najánaha nde jáchi nacatiahva na cāja na tá quiahva cāja mé nde. ¹⁸Sa cuahá ndivaha tañu nacachi i ña yóho xihīn ndo ta viti táhvi ticuií nuú i cáhan tucu u ña xihīn ndo. Ndúu cuahá ñayivi ta cáhí na cúu ná cuéntá Jesús joo cāja na tátuhun na cō cándúsa ña naxihī Jesucristo ndica crúxu. ¹⁹Joo vaxi quivi ndíhi saha ná anda ama cāa quivi sahá ña núu cāja na jáchi a juú quiahva ndíhi ini ná sahá ña xíxi na. Ta ndínehe jícó na mé ná sahá ña núu cāja na ta chí cōo a cácahan nuu ná. Ñaha ñuyíví yóho cuití va cáhvi ini na saha. ²⁰Joo mí cúu yó ñayivi cuéntá Ndióxi, na canduu indiví xihīn mé á. Ta ndátí tiaha i ña quixi Jesucristo, xitoho í chí indiví, mé á jácacu mí. ²¹Ta ndijama mé á yiquí cuñu í, ña nacavitá já ná nduu a tátuhun yiquí cuñu mé á jáchi cáhnu ndivaha cúu á. Ta ndijama mé á mí xihīn ndée a jáchi mé á sáhndá chuun nū tóco ndíhi ñaha xihīn ndée á.

Xíní ñúhú cajii ini ndó xihīn ña cāja Ndióxi xihīn ndo

4 Candehé ndo ñani mí i, na cúu cuéntá Jesús. Xíca ndivaha ini i cuni i ndohó jáchi quíhvi ini i ndohó. Ta cajii ndivaha ini i xihīn ndo jáchi cō cácahan nuu i saha ndo. Cūni ña ná candico ndacú ndo íchi cuéntá Jesucristo, xitoho í.

²Xíca tahví i nū Evodia xihīn nū Síntique ña ná ndique táhan vaha na jáchi in quíhvi cúu ná cuéntá Jesús. ³Ta xíca tahví i nū mún, da cāja

chúun tuun xihín i ña ná cajún ñamaní cahún xihín ndíví quiahva i jan ña ná ndique táhan mání ná. Jáchí ndíví na jan nachindeé cuahá na yehe tá naxica nuu i nacahan i tuhun Ndióxi, mé tuhun cúu jácacu ñayivi. Ta quiahva já nachindeé ri ñaní, da naní Clemente yehe. Ta java ga da cúu cuéntá Jesús nachindeé táhan na xihín i. Sa ndáa va quívi ná nu libro nu ndáa quívi tóco ndihi na catacu anda ama cáa quívi.

⁴Níi tiempo ndítahan cajii ini ndó xihín ña cája Ndióxi xihín ndo. Á sa xíní johó ndó. Níi tiempo ndítahan cajii ini ndó. ⁵Ta xihín ña yóho canda ini tóco ndihi ñayivi ña cúu ndó ñayivi vaha ini. Sa nacayati quívi quixi tucu Jesucristo, xitoho í.

⁶A ndícani nahá ini ndó sahá ni in ñaha. Ña ndítahan caja ndó quéa caca tahví ndo nu Ndióxi níi tiempo ta ndicani ndó nu mé á ndaja cáa ña ndóho ndó. Caca tahví ndó nu á ta a ndíndójó ndo ndiquiahva ndó ndixahvi nu mé á. ⁷Anda já caja Ndióxi ña ná coo vaha ini ndó ta cáhnu chága ña yóho a juú ga tóco ndihi ña cuu canda ini ñayivi. Ta tá ná caja Ndióxi ña ná coo vaha ini ndó já quéa chindeé a ndohó já ná ndindacú ínima ndo xihín xíní túní ndo sahá ña in nanduu ndó xihín Jesucristo.

Xíní ñúhú cahvi ini ndó caja ndó ndinuhu ña vaha

⁸Jandá ña yóho cuití va cúni cahan i xihín ndo, ñani i, na cúu cuéntá Jesús. Xíní ñúhú cahvi ini ndó sahá ña ndaa ta sahá ña cuu coo toní ñúhú ndó xihín. Ta xíní ñúhú cahvi ini ndó sahá ndaja caja ndó ña ndaa. Ta xíní ñúhú cahvi ini ndó sahá ñaha víí. Ta xíní ñúhú cahvi ini ndó sahá ñaha cuu cajii íní ñayivi xihín, ña cuu cahan vaha na saha. Ta xíní ñúhú cahvi ini ndó sahá ña vaha cuu caja ndó ña ná cuu caja cáhnu ñayivi Ndióxi saha.

⁹Caja ndó tóco ndihi ña najánaha i nu ndó caja ndó. Ndítahan caja ndó ña naxini johó ndó nacahan i xihín ña naxini ndó nacaja i. Ta ná coo Ndióxi xihín ndo ta mé á quéa caja ña ná coo vaha ini ndó.

Na cúu cuéntá Jesús ndúu ñuu Filipos chindeé na Pablo

¹⁰Cájii ndivaha ini i ta ndíquiahva i ndixahvi nu Jesucristo, xitoho í jáchi nandicuhun tucu ini ndó sahá i. Co cúni cachi i ña sa nandindójó ndó sahá i, vaha. Ña cúni i cachi i quéa co núná nu ndo chindeé ndó yehe. ¹¹Co cahan i ña yóho xihín ndó sahá ña ndímaní ñaha nuú i jáchi sa nacatiahva i cájii íní i xihín ña íin nuú i. ¹²Sa xíní coo ndáhví ndivaha i ta sa xíní i coo cuahá ndivaha ñaha nuú i. Nacatiahva i coo ndée ini i nu tóco ndihi ña quíxi nuú i. Sahá ña cán quéa íin vaha ini i vatí íin cuahá ña cuxu u á coó a. Ta vatí yójó ñaha nuú i á ndímaní ña nuú i íin vaha ini i. ¹³Sáhan ndée ini i nu tóco ndihi ña quixi nuú i jáchi Jesucristo quéa chindeé a yehe caja

i ña. ¹⁴Joo vaha nacaja ndó jáchi nachindeé ndó yehe tá nandoho ini i sahá ña nandimaní nuú i.

¹⁵Sa xini ndó ña in túhún mé ndó, na cúu cuéntá Jesús ndúu ñuu Filipos jan cúu ndó na nachindeé yehe tá naquee e cuahan i chí Macedonia cahan i tuhun Ndióxi, ña cuu jácacu ñayivi. Ta nacaja ndó ña yóho jáchi nacamáni ndó yehe sahá ña nachindeé e ndohó xihín tuhun Ndióxi.

¹⁶Jáchi tá nasahjin i ñuu Tesalónica cán já nachindahá ta nachindahá ndó ñaha nandimaní nuú i. Ta a juú in tañu cuití va nacaja ndó ña. ¹⁷Co cahan i ña yóho xihín ndo sahá ña cúni ñehe cuití vi ñaha. Ña cúni quea ná चाहvi Ndióxi sahá ñamaní nacaja ndó. ¹⁸Ta viti coó ga ñaha ndímaní nuú i. Janda yójó johu a nuú i viti xihín tóco ndihi ña nachindahá ndó xihín Epafrodito ñehe da naquixi da nuú i yóho. Tóco ndihi ña nachindahá ndó nuú i yóho cúu á ña cájii ndivaha ini Ndióxi xihín. Cúu á tátuhun jóco ndó in ña támi sahan nu mé á. ¹⁹Ta Ndióxi, mé a cája cáhnu i chindeé a ndohó ná a ndímaní ga ni in ñaha nu ndo. Jáchi cuahá ndivaha ña cuicá cómi Ndióxi ta quiahva mé á ña nu ndo sahá ña cúu ndó cuéntá Jesucristo.

²⁰Cáhnu ná cacuu Ndióxi, tátá yo anda ama cáa quivi. Já ná coo.

Ndíndayí Pablo na cúu cuéntá Jesús

²¹Sahá ña in cúu yó cuéntá Jesucristo chindahá i Ndióxi coo tóco ndihi na cúu cuéntá mé á cán. Ta ñaní, na cúu cuéntá Jesús ndúu xihín i yóho chindahá na Ndióxi coo ndó. ²²Ta jári java ga na cúu cuéntá Ndióxi ndúu chí yóho chindahá na Ndióxi coo ndó. Ta na chindahá chága ví Ndióxi coo ndó cúu na cája chúun vehe da cómi cuéntá sahá ñuu Roma.

²³Ná caja Jesucristo, xitoho í cuahá ñamaní xihín tóco ndihi ndó. Já ná coo.